

Resolución numero: 6

Asunto: As consonans xordas –p-, -t-, -c-

Testo de a resolución

S'atorgará preferenzia normatiba á ras formas con a consonán xorda interbocalica conserbata, siempre que se tienga costanzia de a suya existencia e empleo en aragonés: *capeza, betiello, melico*.

Chustificación

Cal primar como normatibas as formas más propias e chenuinas de l'aragonés, as que amuestran un comportamiento más acuerde con a evolución carauteristica dende o latín (a conserbación de as consonans xordas) e que más definen l'aragonés fren á ras luengas románicas bezinas, e isto cuaisquiera que siga a suya categoría gramatical: *forato, esforicar, esmelicarse, allaca, picueta, maturo, melico, polecón, crapa, escopallo, napo, ripa, sapia, capolar, cleta, batallo, pescatero*.

Manimenos, ye de dar que cuan o empleo de a forma con consonán sonora siga ra unica y esclusiba en aragonés, ye ixa ra que cal emplegar sin denguna duda en l'aragonés común escrito: *figado, trigo, rueda*.

Por atro costato, cuan bi aiga palabras que s'emplegan de forma pro cheneralizata u cuasi cheneral con consonán sonora, parixe azeutable a utilización de a forma con consonán sonora, chunto á ra forma con consonán xorda: *aduyar/ayutar, forniga/fornica, crebaza/crepaza, carbaza/crapaza, xada/xata, ez*.

Sin dembargo, en os casos que a forma con xorda siga muito local u rara se preferirá a forma más cheneral con a xorda sonorizata. Exs.: *lugar* millor que *lucar*, *forniga* millor que *fornica*, *cadiera* millor que *catiera*, *moregón* millor que *morecón*, *aduyar* millor que *ayutar*, ez.

Bibliografía

ELCOCK, W. *De quelques affinités phonétiques entre l'aragonais et le béarnais*. París, 1938

TOMÁS, CH. e USÓN, CH. R. *Alazet XIII*